

医案初集



汪心滌兄夫人半產血暈危證

汪心滌兄夫人體孱多病懷孕三月腹痛見血勢欲小
余至時胎已下矣血來如崩昏暈汗淋面白如紙身冷
予曰事急矣非參附湯莫挽僉謂用參恐阻惡露予曰人將
死矣何遠慮爲亟煎參附湯灌之少甦旋復暈去隨暈隨灌
終夕漸定續用參朮耆草歸地枸杞大劑濃煎與粥飲肉汁
閒服旬日始安再投歸脾湯數十劑乃愈後張效伊翁夫人
證同亦照此法治驗乾隆甲寅秋予室人叶孕三月胎墮血
暈日進參耆十數兩乃定後仍半產數次勢皆危險均賴補
劑挽回倘惑于浮議並殆矣



吳立亭翁幼孫傷暑危證治驗

嘉慶辛酉夏立翁幼孫傷暑發熱吐瀉不止神煩體躁唇赤
舌黃口渴欲飲飲後卽吐診脉沉伏手冷過肘足冷過膝
非寒厥欲投涼劑恐其吐瀉脾胃受傷擬用六君子湯除
朮加川連木瓜黃土稻花安脾胃祛暑邪服藥不效維時赤
日當空暑氣正酷偶見庭前花卉枝葉枯萎童子汲水澆之
因悟病機乃與生脉地黃湯一服吐瀉卽止再服脉出肢溫
未及旬而愈思前脉伏肢厥者乃童真未充吐瀉日頻津液
頓傷脉乃血派脾主四肢脾不能爲胃行其津液四肢不得
稟水穀氣故也六味大培真陰生脉保金化液小兒臟氣易

爲虛實是以效速。

梅文彩兄令堂病類噎隔奇證

噎隔一病古人論之甚詳，尙有似隔非隔之證，猶未言及。兄令堂年屆四旬，病經數月初，時不能食飯，後并米飲俱不能咽，強之卽吐。隔證無疑，然每日尙可啜乾麪糲數枚，思古人論隔證不出胃脘枯槁四字，又稱陽氣結于上，陰液衰于下。今旣不能食飯，何獨能食麪？且飲湯卽吐，乾食反安，理殊不解。與逍遙散數服不應，考張氏醫通有飲鵝血法行之，又不驗。更醫多方圖治，亦不效。因勸勿藥，兩載後可食麪湯并精猪肉。今十餘年肌肉不瘦，起居如常，亦奇證也。



鄭鶴鳴夾陰傷寒

鄭鶴鳴君平之流冬月適患傷寒初起寒熱身痛不以爲意延挨數日陡然肢冷脉伏肌肉青紫面赤煩躁呃逆頻頻請同道曹肖巖翁診視詢知係慾事後起病以爲少陰下虧寒邪乘之逼其真陽外越與六味回陽飲服之不應勢已瀕危邀予商酌予曰景岳回陽二方皆能救急其中尚有分別夫寒中陰經審其陰陽俱傷而病尙緩者則從陰陽兩回之法苟真陽飛越重陰用事須取單騎突入重圍舉旗樹幟使旣散之陽望幟爭趨若加合陰藥反牽制其雄入之勢定方單用薑附參草四味煎令冷服外用葱艾炒熱熨臍老薑附子

皮煮汁蒸洗手足。於是一晝夜厥始回。脉始出。惟呃未止。每
呃必至百聲。知爲腎氣上衝。於前藥中參以熟地、枸杞、五
丁香、攝納真元。諸恙漸減。改用右歸飲與服。二日目辣舌燥。
投六味地黃湯。浮陽頓平。復爲調理脾胃及脾腎雙補而起。

鄭媼便閉

鄭媼年逾古稀。證患便閉。腹痛肛脹。寢食俱廢。已經兩旬。諸
治不應。延診以下爲囑。切脉虛細而澀。謂曰：此虛閉也。一補
中益氣湯足矣。何下爲服藥。兩日便仍不通。自言脹痛欲死。
刻不可耐。必欲下之。予曰：下法吾非不知。但年高病久。正氣
虧虛。下後恐其脫耳。媼曰：與其脹閉而死。莫若脫之爲快。因

憶心悟篇云病有不可下而又不可以不下下之不得其法多致誤人。沉思良久于前湯內加入製大黃三錢。倣古大瀉攻於補之意。飲藥後腸鳴失氣。當晚便解結糞數枚。晷能安臥。次日少腹尙痛。知其燥矢未淨。仍用前方大黃分兩減半。再劑便行。兩次先鞭後澹。痛止食進而愈。夫補中益氣湯原無加大黃之法。此雖予之創見。然醫貴變通。固不容膠柱鼓瑟也。

吳光先翁偏中便閉

光翁年踰七旬。偏中臥床不起。治用地黃飲子。叅左右二歸。飲服藥半月。證已守住。惟大便兩旬未圓。腹痛肛脹。蓋由氣

血俱虧不能傳送方如通幽湯補中益氣湯五仁湯濟川煎
屢投不驗思用豬膽汁蜜煎導法無如燥糞已抵肛門
能入每一努掙魄汗淋漓頭暈欲脫無可如何偶記葉氏
中載治便秘有用挖法令病人自用中指染油探入肛內將
燥糞挖碎而出奈病者肢癢自難掉動囑其孫依法行之當
卽挖出燥糞數塊隨後自解穢腐甚多不勞餘力病者稱快
洵治便秘捷法也

董千雲傷寒格陽證

董千雲賣花爲業年逾四旬外狀豐腴冬月患傷寒診脉沉
細無力證見寒熱煩躁頭身疼痛面紅目赤舌吐脣外數寸



病來勢暴詢因房勞感受寒邪逼其虛陽外露卽格陽證也。方定六味回陽飲令其煎成冷服無如飲藥旋嘔并吐蛇蟻躁擾如故甚爲躊躇其母跪求救治勉取前藥半盞冲入猪膽汁數匙試服不嘔良久又與半盞夜閒盡劑晨診躁象畧安舌收吐止仍照原方再進次易八味地黃湯時屆九朝忽口噤不語十一二日又寒熱如瘧有從外感起見者予曰溫中卽可以散邪強主正所以逐寇力排衆議堅持數日稍見轉機此後尙多枝節極力扶住正氣守至兩旬寢食雖安神采欠爽因思前病重時祇圖固正未暇驅邪溫補藥多未免畱邪閉竅曾記方書論傷寒時疫愈後神識不清有屬邪滯

心包之語與服蠶煎兩劑神明頓清續爲調理而痊

許姬傷寒疑難證治

許姬冬月病傷寒寒熱頭痛醫投疏表和解不應漸致
口渴更進苓連清之亦不應便秘經旬用大黃亦不下予初
望其面赤煩躁意屬陽證及切脉細澀又疑陽證陰脉思維
未決因問其汗自病起至今未出捫之膚熯而枯予曰是矣
且不立方姑先與藥一劑有驗再商幸彼農家不諳藥性與
藥卽服次日往視面紅稍退煩躁畧平膚腠微潤予曰生矣
疏方付之乃大青龍湯也又服一劑更見起色轉爲調理而
安渠族人佩之兄與予善亦知醫理問曰君治此病殆有神



助不然如斯重候何藥之奇效之速也予曰仲聖云太陽病不罷面色緣緣正赤者此陽氣怫鬱在表其人躁煩不知痛處但坐以汗出不徹更發汗則愈何以知之脉濇故也子能參悟此篇自知此病之治法矣

吳某時瘧變證

吳某嘗富後貧體虛多鬱病患時瘧堅不服藥已半月矣一夕忽發熱不退胸悶乾嘔醫投小柴胡湯不應熱盛汗多神昏體倦脉細無力嚙語音低急延予診按仲師云譫語有虛有實實則譫語虛則鄭聲素問云言而微終日乃復言者此奪氣也用補元煎合生脉散兩服霍然

族叔曉堂矢志狂妄

族叔曉堂向在吳地貿易情志不舒抑鬱成病神迷譫妄醫無效同人慮有不測送回里中診脉弦急搏指知其因鬱生火因火生痰痰火擾其神明蒙其心竅是以語言不正舉動異常與陽明胃實狂亂之候不同故前醫用下藥不應病久正氣固虛補之又恐助其痰火爰倣服蠻煎加犁尖鐵琥珀辰砂爲引初服譫妄稍定再劑寢食漸安其服十二劑神清語正舉止如常蓋此方能清心肝之熱而通神明故效速如此

族人聯昇休息痢證治奇驗

族人聯昇患休息痢淹纏兩載藥如清火固澁補中升提遍
嘗無效偶遇諸塗望其色萎氣怯知爲脫血之候謂曰爾病
已深不治將殆渠告其故予曰吾寓有藥能愈爾病盍往取
之比隨至寓付藥再服卽愈渠以兩年之疾百治不瘳此藥
效速如此稱爲神丹方用鴉膽子一味去殼取仁外包桂圓
肉撚丸每早米湯送下三十粒旋以食壓之此方初得之人
傳專治休息痢并治腸風便血少則一二服多則三四服無
不應驗然其物不載本草無從稽考其味極苦似屬性寒後
閱幼幼集成書云痢久邪附大腸屈曲之處藥力所不能到
用此奇效思治虛怯沉疴參耆歸地有用數斤愈者治傷寒

熱病。薑附硝黃有用數兩愈者。何此物每用不過二三分。治積年之病。其效如神。物理真不可測。先哲云。千方易得。難求信矣。

堂妹感冒暑風證治

堂妹適隣村許姓。夏日浴罷。忽頭暈仆地。家人扶起。旋即發熱。夜閒熱盛。煩渴嘔吐。譫妄不安。手指掣動。醫藥無效。予診脈息弦數。視舌尖絳苔黃。謂其翁曰。病由暑風相搏。邪熱熾熾。亟宜清解。以杜痙厥之患。方用川連香薷甘草半夏茯苓鈎藤防風青蒿羚羊角荷葉扁莢葉服藥兩劑。熱緩神清。嘔渴亦止。方內除川連香薷鈎藤防風。半夏加沙參麥冬石斛。



醫案
稻露又服兩日證減七八再除青蒿羚羊角荷葉扁莢葉加
玉竹生扁豆女貞子當歸白芍調養而愈

家炳然兄女肝鬱氣厥實有羸狀

炳兄女在室年已及笄性躁多鬱初春曾患吐血夏閒陡然
發厥厥回嘔吐不止汗冷肢麻言微氣短胸膈脹悶脉息細
澁狀似虛象醫投補劑益劇予診之曰此鬱病也經云大怒
則形氣絕而血菀于上使人薄厥又云血之與氣并走于上
乃爲大厥議與越鞠丸加鬱金枳殼茯苓陳皮半夏兄曰女
病臥牀數日粒米不入脉細言微恐其虛脫奈何予曰依吾
用藥則生否則難救蓋此脉乃鬱而不流非眞細弱欲言而

訥乃氣機阻閉故也。觀其以手頻搥胸臆，全屬中焦鬱而不舒，且叫喊聲徹戶外，豈脫證所有耶？請速備藥。吾守此，勿遲疑也。取藥煎服，少頃，膈間漉漉有聲，噯氣數口，胸次畧寬，再服，嘔止，寢食俱安。轉用八味逍遙散，除白朮加香附、鬱金、陳皮，病愈，血證亦泯。

陳某子感證體脉俱厥

陳某子年十六歲，夏月患感證，壯熱神昏，面赤煩渴，唇燥舌焦，口鼻牙根出血，俱屬熱象。惟脉息沉細，四肢厥冷，諸醫不效。時屆九朝，延予商之。予曰：此非陰證，乃陽證也。今日本應重用涼藥，恐汝家畏而不服，姑以小柴胡湯去半夏，人參加。

生地花粉山梔丹皮試之。無如歛俗以爲吃壞熱藥有救涼藥無救。因見方有涼藥果畏不服。三日後勢更劇。復來延予。辭不往。乃浼友人胡君景三代請予曰。救病如救焚。彼病已重。况復遷延。恐難治矣。胡君曰。試往一決。可治則治之。至診其脉前之沉細者。今竟絕無。捫其肢則冷過肘膝。更加腹痛拒按。欲便不解。驚狂不定。予曰。疾急矣。非承氣湯下之不可。疏方訖。胡君私叩予曰。從來傷寒陰陽二證。憑脉用藥。不拘浮沉大小。總以有力無力分之。有力爲陽。無力爲陰。今按脉全無。四肢冷甚。恐屬陰證。奈何。予曰。此乃陽極似陰。證載吳又可瘟疫論中。所謂體脉二厥也。歸檢書與閱胡君以爲。